

瑜伽師地論本地分菩薩地真實義品講義二十六(2014)

一、會通經義〔瑜伽卷45；經過整理〕

若諸有情，於佛所說甚深空性相應經典，不解如來密意義趣。於此經中，說一切法皆無自性、皆無有事、無生無滅，說一切法皆等虛空、皆如幻夢。彼聞是已，如其義趣不能解了，心生驚怖，誹謗如是一切經典，言非佛說。菩薩為彼諸有情類，方便善巧如理會通，如是經中如來密意甚深義趣，如實和會，攝彼有情。

- 無自性義：菩薩如是正會通時，為彼說言：此經不說一切諸法都無所有，但說諸法所言自性都無所有。是故說言：一切諸法皆無自性。
- 無有事義：雖有一切所言說事，依止彼故諸言說轉，然彼所說可說自性，據第一義非其自性。是故說言：一切諸法皆無有事。
- 無生滅義：一切諸法所言自性，理既如是從本已來都無所有，當何所生、當何所滅。是故說言：一切諸法無生無滅。
- 如虛空義：譬如空中有眾多色、色業可得，容受一切諸色、色業。謂虛空中，現有種種若往、若來、若住，起墮屈伸等事。若於爾時，諸色、色業皆悉除遣；即於爾時，唯無色性清淨虛空其相顯現。如是即於相似虛空離言說事，有其種種言說所作邪想分別隨戲論著，似色業轉。又即如是一切言說邪想分別隨戲論著似眾色業，皆是似空離言說事之所容受。若時菩薩以妙聖智，遣除一切言說所起邪想分別隨戲論著；爾時，菩薩最勝聖者，以妙聖智證得諸法離言說事，唯有一切言說自性非性所顯，譬如虛空清淨相現。亦非過此有餘自性應更尋求。是故宣說：一切諸法皆等虛空。
- 如幻夢義：又如幻夢，非如顯現，如實是有；亦非一切幻夢形質都無所有。如是諸法，非如愚夫言說串習勢力所現如實是有；亦非一切諸法勝義離言自性都無所有。由此方便悟入道理，一切諸法非有非無，猶如幻夢，其性無二。是故宣說：一切諸法皆如幻夢。
- 結顯正知：如是菩薩，普於一切諸法法界，不取少分、不捨少分，不作損減、

不作增益，無所失壞。若法實有，知為實有；若法實無，知為實無；如其所知，如是開示。當知是名菩薩隨順會通方便善巧。

二、菩薩八種勝解〔瑜伽卷38〕

云何菩薩具多勝解？謂諸菩薩於其八種勝解依處，具足成就淨信為先，決定喜樂。一者、於三寶功德勝解依處，具足成就淨信為先，決定喜樂。謂於佛法僧真實功德，具多勝解。

二者、於佛菩薩威力勝解依處，具足成就淨信為先，決定喜樂。謂於如前所說威力，具多勝解。

三者、於真實義勝解依處，具足成就淨信為先，決定喜樂。謂於如前所說真實義，具多勝解。

四者、於因勝解依處，具足成就淨信為先，決定喜樂。謂於種種如應所攝無顛倒因，具多勝解。

五者、於果勝解依處，具足成就淨信為先，決定喜樂。謂於種種如應所攝無顛倒果，具多勝解。

六者、於應得義勝解依處，具足成就淨信為先，決定喜樂。謂於無上正等菩提所應得義，我有堪任定當能得，具多勝解。

七者、於得方便勝解依處，具足成就淨信為先，決定喜樂。謂於一切菩薩學道能得方便，由此方便得應得義，具多勝解。

八者、於善言、善語、善說勝解依處，具足成就淨信為先，決定喜樂。謂於契經應頌、記別等法，具多勝解。

〔十二分教：契經、應頌、記別、諷誦、自說、因緣、譬喻、本事、本生、方廣、希法、論議。〕

於此八種勝解依處，應知菩薩由二因緣具多勝解：一者、多修勝解故；二者、積集猛利忍故。